



2 de abril de 2012. A reacción cidadá perante a catástrofe ecolóxica do Eume non se fai esperar: este luns 2 ás 20h constituirase en Pontedeume a [Plataforma pola Defensa das Fragas do Eume](#)

da que ADEGA fará parte. Trataremos de sensibilizar á opinión pública do valor ecolóxico que aínda conservan as Fragas; demandaremos da Xunta medidas para remediar no posible os impactos do lume no ecosistema do Parque e esixiremos unha investigación exhaustiva das causas do incendio e as responsabilidades penais e políticas que procedan. ADEGA chama tamén a participar nas diversas

[concentracións de protesta](#)

por esta catástrofe que se están a preparar nas principais vilas e cidades galegas. É unha traxedia para o País, que a cidadanía non pode esquecer nen perdoar!

Independentemente das causas do lume nas Fragas, claramente intencionado, ADEGA cre preciso promover unha reflexión que trascenda a coxuntura particular deste incendio. Cómpre analizar as causas de fondo, tanto das políticas de loita contra o lume e de xestión dos nosos montes como das de conservación, e non esquecermos esixir responsabilidades aos que as deseñaron e executaron.

Encol da política forestal, a cidadanía merece que a administración resposte a estas cuestións chave: -Quen recurtou en 20 millóns de € os orzamentos para prevención e 2 millóns de € para extinción? -Quen promove unha [Lei de Montes](#) que reduce as faixas de protección, o tempo para aproveitar os terreos queimados e permite masas monoespecíficas (eucaliptos, por exemplo) de máis de 50 ha continuas?

-Quen reduciu significativamente e precarizou os operativos de loita contra o lume, eliminou o [Voluntariado do Monte](#), suspendeu as BIIF (Brigadas de Investigación dos Incendios Forestais), desactivou as UXFOR e abriu a porta á especulación do monte coas SOFOR?

E a respecto das políticas de conservación, cómpre tamén reflexionar sobre a actual situación dos nosos espazos protexidos, abandonados á súa sorte, sen investimentos nen iniciativas ([PO](#)

[RN, PRUX](#)

) que garantan a conservación do patrimonio natural que atesouran. E non só iso: a Xunta levou a cabo unha estratexia de demolición controlada destes espazos, através das

[modificacións da Lei do Solo](#)

, do

[POL](#)

, do

[PDA](#)

, etc. que rematou finalmente cun

[Plano Director da Rede Natura](#)

para permitir nas zonas de maior valor ambiental, mesmo en Parques Naturais, piscifactorías, incineradoras, caza, rallys, recualificar solo rústico...

Todas estas iniciativas son responsabilidade da actual Xunta e non son alleas á catástrofe que agora sofren as Fragas do Eume. Non é isto tan delictivo como a actuación dos pirómanos que lle puxeron lume?